

佛說大乘同性經卷上

慕三

宇文周三藏闍那耶舍共僧安譯

如是我聞一時娑伽婆住在大摩羅耶精妙  
山頂摩訶園林華池沼邊大持呪神所居止  
處人不能行最得道者所居之處共大比丘

卷三

千二百五十人俱一切皆是摩訶聲聞所作  
已辦已過一切凡夫之地其名曰尊者阿若  
僑陳如尊者阿說示尊者摩訶迦葉尊者舍  
利弗尊者摩訶目犍連與如是等諸大聲聞  
復有菩薩摩訶薩衆皆大菩薩悉得一切菩

薩三昧陀羅尼行一切已住諸菩薩地其名  
曰聖者彌勒菩薩摩訶薩大意菩薩摩訶薩  
益意菩薩摩訶薩堅意菩薩摩訶薩定意菩  
薩摩訶薩無盡意菩薩摩訶薩無邊意菩薩  
摩訶薩海意菩薩摩訶薩正定意菩薩摩訶  
薩淨意菩薩摩訶薩智意菩薩摩訶薩如是  
等一切各各佛刹已得受記為阿耨多羅三  
藐三菩提轉法輪故復有最上最勝天龍夜  
叉乾闥婆阿脩羅迦樓羅緊那羅摩睺羅伽  
并持呪神及非人等種種形容天冠衣服執

持器仗并諸幢蓋及諸鬼神仙人衆等皆來  
集坐為欲聽法爾時世尊衆如大海前後圍  
遶有所說法初中後善其義深遠其語巧妙  
具足廣說清淨梵行爾時楞伽大城之中有  
羅刹王名毗毘沙那治化於彼時毗毘沙那  
楞伽王聞佛今住大摩羅耶精妙山頂摩訶  
園林華池沼邊大持呪神所居之處人不能  
行最得道處與千二百五十比丘現說梵行  
時毗毗沙那楞伽王即生念言如來名字世  
間希有如優曇華於無數時乃一得聞何況

值佛我於是中無量無數時不得聞法猶如  
盲龜遇浮木孔是中諸佛及以佛法入佛境  
界證佛道者如是之事倍復最難我若齋持  
多諸珍寶及真珠貫無量香華末香塗香華  
冠衣服寶幢幡蓋并及繒束音樂歌讚與我  
眷屬往詣佛所到佛所已以此種種供養之  
具供養如來欲問正法報我一生時毗毗沙  
那楞伽王普皆宣告諸羅刹衆汝等可共同  
心和合捉持豐足勝妙金銀摩尼寶珠珂玉  
瑠璃珊瑚碼碯真珠瓔珞并赤真珠種種精

卷三

二

妙無量香華作諸音樂及以歌讚須向佛所  
 如來法王三界最勝無上福聚具足衆相一  
 切知見無上福田我等向彼持此供具以用  
 供養所以者何於無數時值佛出世得見佛  
 難離八難難聞三寶難作此念已爾時毗毗  
 沙那楞伽王於其衆中說偈告言  
 無量無數時 佛乃現世間 欲離於八難  
 復經無量世 百千億劫中 希逢於世尊  
 譬如優曇華 無數時乃出 地獄與畜生  
 最苦餓鬼道 往來於六趣 展轉如車輪

今此衆生類 離諸八難厄 利益衆生故  
 故出世間燈 智日光所照 能破無明盲  
 相隨至彼處 供養無上尊 教天人世中  
 供養獲大果  
 爾時毗毗沙那楞伽王說此偈已佛神力故  
 於虛空中放百千億那由他大光明網遍照  
 楞伽大城照已毗毗沙那及一切羅刹衆皆  
 悉踊躍爾時彼大光明焰中演出甚深法相  
 之偈  
 諸法本寂空無我 衆生初中後叵得

譬如虛幻夢泡焰 霧電水沫旋火輪  
 世諦緣法悉非真 無明愛根世間現  
 真觀無愛及無明 諸法如空淨巨說  
 爾時毗毗沙那楞伽王聞彼光明網中演出  
 如是法相偈已即得甚深無我法忍彼羅刹  
 衆中或得忍者或有發於菩提心者或有發  
 順忍者有實見者時毗毗沙那楞伽王於佛  
 法中明了無疑既著菩提堅甲鎧已復發此  
 願而說偈言

天人及與阿脩羅 一切梵王上天衆

如此無上最妙法 彼等未曾得覺見  
 我應未來得斯法 具足一切無礙智  
 此世界中成佛道 度脫無量億衆生  
 演說諸佛微妙法 最勝無漏八聖道  
 令我所作無邊智 三十二相莊嚴身  
 若有精勤行善行 及佛功德行滿足  
 利益衆生脫怖畏 持諸功德滅有塵  
 面如日月淨光明 於三界中得作佛  
 爾時毗毗沙那楞伽王於阿耨多羅三藐三  
 菩提得不退轉即隨其意應念出生種種精

妙華香塗香末香華冠衣服寶幢幡蓋摩尼  
 繒束真珠瓔珞作諸妓樂擊掌歌讚妙聲遍  
 滿讚歎如來功德相好持如是等諸供養具  
 與其眷屬於虛空中如鵝王行來向佛所至  
 佛所已從空而下時毗毗沙那楞伽王與眷  
 屬俱向佛合掌接世尊足頂禮百徧禮拜訖  
 已遶佛三匝乃至千匝時毗毗沙那楞伽王  
 即於佛所五體投地如斫樹倒復說此言南  
 無無量功德莊嚴最上法身師子丈夫三界  
 最勝世尊釋迦牟尼至真等正覺出此語已

即起合掌於世尊前說偈讚歎

昔世億生專精事	難行苦行求菩提
布施飲食及衣乘	億數七珍與乞者
不思議劫無悔吝	捨國聚落及臣民
王宮莊嚴寶豐滿	億劫難捨皆能捨
昔名王子須大拏	於山林中施妻子
前捨自身救產虎	割其身肉濟窮餓
挑眼施盲婆羅門	於彼生中無怨恨
施頭為求菩提因	心於索者常歡喜
為護戒品長清淨	不犯聖行順無為

不斷生命盜他物	常順梵行世無妬
離於飲酒不妄語	護諸眾生如己身
昔不兩舌諸惡口	亦無瞋恚說綺語
世尊離邪常調順	於前眾生無惱觸
功德如意離邪見	供養三寶無壞心
出家無垢除五欲	依順佛戒解脫行
前行忍辱受諸苦	誹謗毀訾及因責
往昔所受諸苦痛	為眾生故無恨心
若在佛邊起殺惱	於彼慈心視如子
佛生於世常修忍	解脫億數苦眾生

如來往昔求道時	作大仙人名曰忍
彼所生中被割截	忍痛於王無害心
為彼國王及夫人	演說白法令歡喜
不思億劫常精進	懈怠邪意狹劣除
昔諸苦行皆能忍	廣大精進覺菩提
經行不睡亦無乏	尊重供養無量佛
眾生所須常隨順	熏修成佛無上法
昔行禪定為伏心	已善四禪無色定
三昧念五神通力	往昔行滿無漏禪
如來智慧滿無漏	知法如幻悉虛假

無我衆生命及人 煩惱網纏因業轉  
 欲界不淨四種惑 衆生煩惱界本淨  
 既知實淨衆生本 得具六種波羅蜜  
 誰能說此智方便 勤求無盡佛福聚  
 發勝三業向如來 來世得佛我頂禮  
 爾時毗毗沙那楞伽王說此偈已復以無量  
 種種最妙及以香華末香塗香華冠衣服寶  
 幢幡蓋音樂歌詠讚歎如來尊重恭敬具足  
 承事供養於佛并諸聲聞大菩薩衆彼羅刹  
 衆亦復如是如法發起供養如來稱可佛意

爾時毗毗沙那楞伽王供養訖已白佛言世  
 尊我今有疑欲問如來至真等正覺唯願世  
 尊為我開解說此語已佛告楞伽王言楞伽  
 王吾常開汝問佛所疑隨汝意樂當為解說  
 令心歡喜時楞伽王得開許已白佛言世尊  
 衆生者以何義故名爲衆生佛言楞伽王衆  
 生者衆緣和合名曰衆生所謂地水火風空  
 識名色六入因緣生又衆生者猶如束竹緣  
 業故報緣業得果我人衆生壽命畜養衆數  
 知者見者作者觸者受者是名衆生毗毗沙

那楞伽王言世尊彼衆生者以何爲本依何  
而住以何爲因佛言楞伽王此衆生者無明  
爲本依愛而住以業爲因毗毗沙那楞伽王  
言世尊業有幾種佛言業有三種何等爲三  
身口意業復有三相淨不淨非淨非不淨時  
毗毗沙那楞伽王復白佛言世尊云何衆生  
捨此壽命受彼壽命捨此故身受彼新身佛  
言楞伽王衆生捨此身已業風力吹移識將  
去自所造業而受其果若善及不善非善非  
不善衆生如此造業行者即於彼處而受新

身或受卵生或受濕生或受胎生或受化生  
皆是一切業風所造而業亦不自知而造各  
自受報楞伽王衆生如是捨此身命受彼新  
身楞伽王言世尊衆生捨此身命未受彼身  
於其中間識停何處佛言楞伽王於汝意云  
何田中種子至生芽時爲當子先滅幕三已然後  
芽生爲當其芽先生然後子滅爲當惟子滅  
時其芽即生毗毗沙那王言不也世尊佛言  
楞伽王是義云何楞伽王言世尊其子若滅  
其芽即生非先子滅然後芽生非先生芽然

後子滅佛言如是楞伽王非前識先滅後識方生楞伽王亦非先生後識前識方滅楞伽王唯前識滅後識即生楞伽王如步屈蟲先安頭足次後足隨其形屈伸間無斷絕如是如是楞伽王此之神識見前有中生處了已識即令移託就於彼間無斷絕毗毗沙那楞伽王言世尊若如是者無中陰耶佛言楞伽王一種衆生卵生是也捨此身已入於卵中而是神識業風所提停住卵中昏鈍不覺及至覆成識方覺了當知彼卵已爲熟也何以

故卵生衆生法如是故未成熟時不覺不了所以者何爲業力故楞伽王復有衆生福力純厚得於轉輪王家作子而彼在胎不爲胎汙亦不與胎不淨共住亦不汙染楞伽王其轉輪王所生子者多受化生設受胎者初入胎中結子已成及生出後破膜出身楞伽王是因緣故說有中陰時毗毗沙那楞伽王言世尊衆生神識爲當幾大爲作何色佛言楞伽王衆生神識無邊大無色無相不可見無礙無形無定處不可說毗毗沙那言世尊識

相如此無有邊大無色無相不可見無礙無形無定處不可說者豈非斷絕佛言楞伽王吾今問汝隨汝意答當為汝說楞伽王譬如大王在宮殿中或高樓上姝女圍繞安樂坐時著種種衣及諸瓔珞時大園林阿輸歌樹種種雜華莊嚴精麗其園在處有細軟風或大駛風吹彼園林阿輸歌樹衆華香氣至王所者王聞之不毗毗沙那白言世尊我聞此香佛言楞伽王汝聞此香分別知不王言世尊我能得知佛言楞伽王此華香氣三言知

者見大小耶定作何色楞伽王言不也世尊何以故此香氣相無色無現無礙無相無定處不可說是故不見大小形色佛言楞伽王於意云何若不見彼香氣大小非斷絕相耶毗毗沙那言不也世尊何以故若此衆香是斷相者無人得聞佛言如是如是楞伽王識相亦爾應如是見楞伽王若識斷相則無生死而可得知如是楞伽王識相清淨惟是無明貪愛習氣業等諸客煩惱之所覆障楞伽王譬如清淨虛空之界唯有四種客塵汙染

何等為四所謂煙雲塵霧楞伽王識相如是  
本清淨故無邊不可捉無有色染唯是諸客  
煩惱之所覆染所以者何楞伽王若正觀時  
不得衆生無我無衆生無壽命無畜養無人  
無衆數無知者無見者無覺者無受者無聽  
者乃至無色受想行識等楞伽王若正觀時  
無有分別而可得者楞伽王諸法和合無有  
實相汝雖得是衆生實相亦莫捨此生有曠  
野云何名得衆生實相所謂得彼大智同性  
爾時世尊而說偈言

衆生業力自迴轉 不得八聖最上道  
若離諸業證無漏 行無上行利衆生  
時毗毗沙那言世尊有無量恒河沙等衆生  
於此三界稠林有海到彼岸者復欲到者有  
證聲聞法者有證緣覺法者亦有若干已證  
無上大智同性者於未來世亦有無量無邊  
不可數阿僧祇過是數恒河沙等衆生乘此  
三乘各各別乘得入涅槃而衆生界無增無  
減如是世尊我知如是心生厭倦佛言楞伽  
王汝莫於此生厭倦想所以者何諸衆生界

前後不可盡故虛空界法界亦爾是故楞伽  
王諸衆生界不可言說以是得知不增不減  
如是三界稠林有爲海中已得度者當欲度  
者而衆生界亦無增減楞伽王譬如虛空界  
不增不減無前無後亦無中間是故虛空不  
可得知徧一切處無礙無形無作無相如是  
如是楞伽王非衆生界有初中後求之可得  
楞伽王唯有已得聖法同性是名盡於衆生  
界耳而有爲道不盡不減楞伽王亦不離彼  
有解脫道何以故是衆生界法如此故是故

無初無中無後毗毗沙那復問佛言世尊衆  
生有爲行海相貌何似佛言楞伽王衆生有  
爲行海猶如大海復問佛言世尊諸佛之法  
復似何等佛言楞伽王諸佛之法猶如船舶  
復問佛言世尊出家比丘受具戒法復似何  
等佛言楞伽王出家比丘受具戒法似治生  
人乘於船舶復問佛言世尊如世尊說依佛  
戒法具足奉行無毀破者復似何等佛言持  
戒精進愛法知足似治生人乘堅牢船成就  
具足楞伽王有能如佛所說戒法不破不犯

具足行者亦復如是復問佛言世尊善知識者復似何等佛言楞伽王善知識者猶如船師復問佛言世尊勤行八聖道復似何等佛言楞伽王勤行八聖道者似正疾風吹於船舶毗毗沙那復問佛言世尊禪定三昧及諸神通復似何等佛言楞伽王神通三昧猶如寶國毗毗沙那復問佛言世尊七菩提分復似何等佛言楞伽王七菩提分猶如七種寶性復問佛言世尊得七菩提分證大乘同性者復似何等佛言楞伽王得七菩提分證大

乘同性者譬如值得七種寶性巨富貨賄稱意滿足善哉善出家者於我法中證於無礙無上佛果爾時世尊復說偈言

觀察諸有苦 自苦衆生苦 亦捨諸有縛

我法中出家 即名爲佛子 衆中最大德

勤苦如法行 當得爲世尊

爾時毗毗沙那復問佛言世尊若有衆生於佛法中得出家已不能持戒或有犯戒或有破戒犯欲行者或有脫於法服捨戒還俗世尊如是癡人譬如何等佛言楞伽王若有衆

生於我法中得出家已受於戒法作諸毀犯  
是癡人輩多墮惡道如治生人在大海中船  
舶破壞沒命於水毗毗沙那言世尊若有破  
戒犯戒欲行者復說我行精進梵行復有  
捐棄法服捨戒還俗彼一種人命終亡已或  
生好處彼似何等佛言如治生人於大海中  
船舶破壞沒溺水中或有得船板者或有得  
死屍者或有自力浮者楞伽王是治生人得  
船板者因風力吹得至洲島捉死屍者海波  
所推漸到彼岸何以故大海之法不宿死屍

若其自力能浮得渡隨意所至此是海神慈  
悲濟彼如是如是楞伽王若我法中得出家  
者不能依戒如法護持若捨戒法著於俗服  
得生善處者或因我邊得正信者或復內淨  
或雖破戒恒有慈行或有精進是故楞伽王  
雖是破戒及還俗者還因我法得生善處爾  
時世尊而說偈言  
往昔已作多罪業 無邊千億世生中  
發露懺悔更不造 滅無增長故清淨  
時毗毗沙那復問佛言世尊凡有幾種助善

提法佛言楞伽王有三十七品助菩提法何者名為三十七品所謂四念處四正勤四如意足五根五力七覺分及八聖道楞伽王是名三十七助菩提法復問佛言世尊解脫門者為有幾許佛言楞伽王有三解脫門十二何者為三所謂空無相無願復問佛言世尊須念何法佛言念歇滅入涅槃復問佛言世尊諸對治法凡有幾許佛言楞伽王總而言之三種對治何者為三謂貪欲心者不淨觀瞋恚心者慈悲觀愚癡心者因緣觀是名三種對

治之法復問佛言世尊幾許巧能應須念持佛言楞伽王須念持者巧知陰巧知界巧知入巧知方便復問佛言世尊須作何觀佛言楞伽王須觀甚深十二因緣及四聖諦因果證等爾時毗毗沙那楞伽王復更圍遶世尊三币以諸雜色七寶之華散於佛上散已右膝著地合掌向佛敬歎如來而說偈言云何菩薩諸聖行 生精進意利世間 施戒忍辱及精進 發最上意為菩提 求彼無漏智慧時 攝化多億諸眾生

衆寶莊嚴無垢濁 精妙剎中得成佛

爾時世尊告毗毗沙那楞伽王言善哉善哉  
楞伽王汝能諮問如來此事諦聽諦聽善思  
念之當爲解說楞伽王菩薩摩訶薩常須行  
六波羅蜜於一切衆生邊不生惡心楞伽王  
菩薩行如是法時菜三不減不少於諸佛法常得十三  
增長亦不染著世間之法攝受教化無量衆  
生亦能清淨如來剎土復能具得大乘同性  
於佛法中無障無礙爾時毗毗沙那楞伽王  
白佛言世尊云何修行云何得住阿耨多羅

三藐三菩提佛言放捨憍慢貢高嫉妬常行  
四種清淨梵行歡喜普爲一切衆生恒行正  
真須捨殺盜妄言綺語兩舌惡口飲酒婬泆  
莫使暫忘菩提之心意樂勤行六波羅蜜所  
作恒爲安樂衆生於有爲中心常寂靜欲度  
有海多諸怖畏汝當正觀三界衆生今得度  
脫復次楞伽王汝若欲求菩提之者須如是  
知言菩提者但有名字言語謂菩提耳何以  
故楞伽王無有是菩提無根是菩提無住是  
菩提無垢是菩提無塵是菩提無我是菩提

不可捉是菩提無色是菩提無形是菩提無  
此是菩提無彼是菩提無憂是菩提無惱是  
菩提無著是菩提無染是菩提無邊是菩提  
無偽是菩提無濁是菩提已過一切根是菩  
提除一切憶想念是菩提已過一切有行是  
菩提無底是菩提難知是菩提甚深是菩提  
無字是菩提無相是菩提寂靜是菩提清淨  
是菩提無上是菩提無譬喻是菩提無求是  
菩提無斷是菩提不壞是菩提無破是菩提  
無思惟是菩提無物是菩提無為是菩提無

見是菩提無害是菩提無明是菩提無流注  
是菩提常住是菩提虛空是菩提無等等是  
菩提不可說是菩提楞伽王欲求菩提者若  
不求法是求菩提何以故楞伽王若無有著  
得證阿耨多羅三藐三菩提又無我相衆生  
相命相人相畜養相衆數相作相受相知相  
見相乃可得證阿耨多羅三藐三菩提若不  
得世諦相者不執著法不執著陰界乃至不  
執著諸佛菩薩乃可得證阿耨多羅三藐三  
菩提何以故楞伽王無所執著即是菩提若

蘇三

十四

不執著物若不執著常若不執著斷者於未  
 來世證成菩提所以者何楞伽王一切諸法  
 後際滅故時毗毗沙那楞伽王復白佛言世  
 尊云何得知一切世諦法耶佛言楞伽王知  
 一切世諦法如幻如化如夢如焰如水中月  
 如乾闥婆城一切世諦法應如是知如是覺  
 如是觀爾時毗毗沙那楞伽王即得菩薩三  
 昧名無等等法光明智相得陀羅尼名一切  
 巧音得如是等無量無邊諸三昧陀羅尼已  
 時毗毗沙那楞伽王即白佛言世尊我今得

此三昧陀羅尼已覺知一切世諦之法佛言  
 楞伽王云何覺知毗毗沙那言世尊一切世  
 諦之法如夢如幻如響聲等如山水駛如水  
 中月如風吹空華如秋雲起如珠光明如燈  
 火焰如華上露如乾闥婆城如水上泡如虹  
 如焰世尊我已覺知世諦諸法現皆無常爾  
 時世尊即放頂上百千億那由他種種妙色  
 光明所謂青黃赤白紅紫玻瓈及金等色普  
 照無量無邊阿僧祇諸佛刹土既徧照已還  
 入頂上爾時尊者大目犍連即從座起徧袒

卷三

十五

右肩右膝著地合掌向佛說偈問言

佛上妙德非無因

開放清淨光明網

今意精妙覺發誰

放百光網願佛說

佛告目犍連言汝見此毗毗沙那楞伽王在於我前合掌正立以此廣大供養之具用供養我及聲聞眾諸菩薩眾因此功德發阿耨多羅三藐三菩提心不目犍連言世尊我見世尊我見佛言目犍連是毗毗沙那楞伽王從我已去乃至當欲供養承事百千億那由他諸佛過是已後彼身功德本力具足今有

世界名蓮華城彼有世尊號蓮華功德相震聲威王如來阿羅訶三藐三佛陀現在彼住遊行說法彼佛如來壽命無量世界清淨此毗毗沙那楞伽王化生彼刹生彼中已即得菩薩歡喜之地如是乃至得菩薩十地過無量劫數已於後生此娑婆世界當得成佛號曰善妙震聲金威善淨光明現功德寶蓋莊嚴頂相毗盧遮那王如來應供正徧知明行足善逝世間解無上士調御丈夫天人師佛世尊是最後生彼世界者名電寶冠除諸山

阜坑坎崖坂土石糞穢無有女身及惡道等  
 而彼佛刹清淨勝彼現在阿彌陀如來佛刹  
 諸菩薩衆充滿彼國劫名善觀明彼佛如來  
 壽命無量目犍連是故如來至真等正覺微  
 笑時毗毗沙那楞伽王得受阿耨多羅三藐  
 三菩提記時卷三以為法故歡喜踊躍徧體戰慄  
 飛上虛空高七多羅樹於虛空中說此偈言  
 一切諸法空如夢 清淨非有同虛空  
 我及無我悉皆無 我知如化如電光  
 衆生有中自生滅 諦求一法不可得

初中後等無所有 畜養衆生命亦然  
 衆生隨業得果報 有中展轉不休息  
 若行如此菩提行 得知諸法體皆空  
 爾時毗毗沙那楞伽王說是偈已從空中下  
 遶佛三匝遶三匝已蒙佛威神却坐一面時  
 海衆中或有天龍阿脩羅等證法得果者或  
 有夜叉羅刹發菩提心者或有緊那羅摩睺  
 羅伽於諸佛法得無疑者或有迦樓羅乾闥  
 婆及呪神等得陀羅尼證法得果於一切法  
 得不退轉者即時大地震動自然光明徧滿

佛刹乃至大小鐵圍山間普皆明照一切惡道諸苦悉除上虛空中雨諸天華響擊天鼓叫嘯等聲并諸衣服空中舒卷自然顯現如是種種不思議事時毗毗沙那楞伽王觀其自眾如是告言汝等一切相與和合來向世尊生恭敬心發於阿耨多羅三藐三菩提心第十七時彼無量百千羅刹相與和合向佛合掌白言世尊我等聚集相與和合從今已去歸依於佛及以法僧發菩提心世尊我等從今已去行大乘行如來證知世尊我等於未來世

在此娑婆刹中得成正覺定斷惡業為無上尊為一切眾生作利益故佛言善哉善哉汝等若能發菩提心者汝等當行四種善法凡善行者行此四法得不忘彼菩提之心何等為四一者所有願行不違不失二者於諸眾生常行慈心三者一日三時供養三寶晝夜不絕四者不願聲聞辟支佛果此為汝等四法具足不忘失彼菩提之心爾時海龍王從座而起偏袒右肩右膝著地向佛合掌白言世尊毗毗沙那楞伽王往昔造何善根乃能

如是廣供養具供養於佛及無數聲聞菩薩  
衆等供養訖已發菩提心發菩提心已證不  
退轉得受阿耨多羅三藐三菩提記作是語  
已佛告海龍王言龍王往昔過無量阿僧祇  
劫數時彼有佛號大悲所生智相幢如來至  
真等正覺應供正徧知明行足善逝世間解  
無上士調御丈夫天人師佛世尊而彼如來  
亦還生此娑婆世界五濁世中而彼如來至  
真等正覺於衆生中演說分別三乘之法龍  
王時彼如來亦還住此摩羅耶山頂上與五

百比丘大聲聞衆無量天龍及非人等衆中  
說法龍王時有羅刹童子名毗毗沙歌亦還  
住此楞伽大城形貌雄猛大腹巨力其性硬  
惡面目鄙醜唯食肉血口牙可畏龍王時彼  
毗毗沙歌羅刹童子聞佛世尊住摩羅耶山  
頂上第三即作是念我不欲此沙門及比丘衆在  
摩羅耶山頂上居住何以故若彼沙門住在  
摩羅耶山頂上者我不能攝大海雜類亦無  
衆生可殺害者我今住此則恒饑餓龍王時  
彼毗毗沙歌羅刹童子即告其衆諸羅刹言

汝等有大力者宜可速來著堅牢甲各執刀杖槌弩斧戟弓箭鉞盾并金剛杵鬪輪稍等嚴持如是種種器仗何以故我今應當驅彼沙門及沙門衆去我境界令其捨離我所住處龍王時毗毗沙歌羅刹童子帶好堅甲及羅刹衆各持種種別色器仗飛行虛空向彼大悲所生智相幢如來往至彼已住在虛空與其徒衆語世尊言去去沙門我不用汝住此山頂莫復令我殺汝沙門及汝衆等龍王爾時大悲所生智相幢如來即現神通現神

通已時毗毗沙歌羅刹童子及其徒衆各見自身被五繫縛又見十方鐵網羅布欲走無路禁然定住龍王時毗毗沙歌羅刹童子及羅刹衆心驚惶怖即生是念我等今者欲何處去求歸命誰向誰求救誰脫我等龍王爾時彼佛衆中有呪神王名正定深滿功德威與彼毗毗沙歌羅刹童子宿作善友在彼世尊衆中集坐龍王爾時正定深滿功德威持呪神王語毗毗沙歌羅刹童子言善友諸佛世尊教化人天所得無量諸功德法三界獨

幕三

十九

尊衆生中寶有大悲行汝善友及羅刹衆此  
可歸依及以法僧汝等歸依三寶發菩提心  
一切繫縛即得解脫說是語已龍王爾時正  
定深滿功德威持呪神王教化力故及佛神  
力即時毗毗沙歌羅刹童子及羅刹衆俱共  
合掌出如是言南無無邊功德莊嚴身者南  
無最上大悲覺者我等與汝今日已去歸依  
於佛及以法僧我等恒行歸依三寶發阿耨  
多羅三藐三菩提心龍王時毗毗沙歌羅刹  
童子及一切羅刹衆出此言已一切繫縛即

得解脫從虛空來向大悲所生智相幢王如  
來至彼世尊三帀圍繞時毗毗沙歌羅刹童  
子及羅刹衆一切俱時頂禮佛足於彼如來  
乞求懺悔乞懺悔已各還本處龍王於汝意  
云何汝今當知是時世中毗毗沙歌羅刹童  
子者豈異人乎今毗毗沙那楞伽王是也時  
彼世中羅刹衆者更非別衆今毗毗沙那楞  
伽王羅刹衆者是也龍王於汝意云何時彼  
世中正定深滿功德威持呪神王者亦非別  
人即是海妙深持自在智通菩薩摩訶薩是

也作是語已此三千大千世界即時震動猶如船舶在大海中隨波動搖衆生類中無見驚怖及以害者唯得一切安隱快樂一切衆生持十善行時此娑婆佛剎除去高山須彌大海國土聚落山林海島黑山龕窟稠林園池河泉陂澤丘陵坑坎崖隴石壁沙鹵棘刺泥糞臭穢可惡悉除閻浮檀金大光普照此三千大千世界所有一切大小鐵圍山中一切諸暗一切光明及以日月所不照處彼明徧照隱蔽日月況餘光明一切諸影是時不

卷三

二十

現滅除一切地獄畜生餓鬼等苦即時此娑婆世界諸天人等若有苦惱一切皆得安隱受樂若有衆生饑者得食渴者得飲裸者得衣貧者得寶盲者見色聾者聞聲瘖者能語六根殘缺悉得具足閉在牢獄普皆解脫

佛說大乘同性經卷上

音釋

齋祖持也切鎗苦亥切訾將几切膜慕各切駛

疎士切舶大傍切賄呼罪切洗夷質切捷

疾也渠馬慄力質切銓鉞莫切盾食尹切盪干櫓切屬也裸

稍兵所角切禁渠寒貌鹵郎古切沙鹵謂

赤郎果切瘕烏不能言也

佛說大乘同性經卷下

慕四

宇文周三藏閣那耶舍共僧安譯

是時雜類衆生無有貪欲瞋恚愚癡慳妬等  
心各各惟有善心慈心安樂之心猶如父母  
兄弟姊妹當於是時一切衆生得如是等心  
行安樂歡喜踊躍徧滿諸根無復寒熱及以  
憂愁如是一切衆生樂心具足不聞高聲及  
諸大聲復此大池平正如掌瑠璃所成化出  
種種深廣妙池七寶爲砌金沙布底八功德  
水清淨盈滿彼諸池中自然化出無量蓮華

大如車輪彼諸妙華有七寶色開敷微妙其  
葉柔軟或復化出無量蓮華廣一由旬雜色  
精妙香氣柔軟如迦陵伽衣又復化出百千  
億那由他多諸種種蓮華莊嚴或復化出無  
量蓮華廣二由旬或三四五乃至一十二十  
三十四十五十及百由旬或復化出無量蓮  
華廣千由旬是時娑婆佛刹雨大香雨灑散  
於地彼水香氣柔軟微妙能令衆生歡喜踊  
躍諸微妙風吹彼種種天妙華雨自然墮落  
所謂曼陀羅華摩訶曼陀羅華曼殊沙華摩

訶曼殊沙華月華大月華意華大意華雨如是等廣大諸華復有勝妙諸末香雨復有沉水香多伽羅香黑沉水香牛頭栴檀此等香煙如是出現處處徧滿又復出生過無量百千億那由他阿僧祇數大如意樹七寶所成縱廣高下或一由旬乃至百由旬最勝端嚴悉皆樂見其諸寶樹以種種寶衣服繒綵白拂垂眊鈴網莊嚴彼諸寶樹雨於種種精妙七寶所謂金銀瑠璃摩尼真珠碑礫碼碯赤真珠貫如是等雨又諸寶樹雨種種柔軟雜

色衣服所謂歌奢衣俱奢衣憍奢耶衣歌尸歌衣如是等雨又諸寶樹雨諸瓔珞以閻浮檀金所作成種種雜寶間錯微妙所謂鑠釧耳璫天冠臂印珠繩寶纓金鎖瓔珞如是等雨又彼諸寶如意樹下出生百千億那由他師子之座各以種種七寶所成彼師子座兼四高於七仞菩薩坐上三十二相莊嚴其身容貌端嚴衆所喜見其身內外自然明徹彼一切諸菩薩前出生百千億那由他塔各七寶成彼諸塔上各千天子而坐其上奏五音樂

并出歌歎其聲精妙能令聞者心意喜躍其音聲中出諸歌讚說是偈言

平等無等等 我所悉皆無

一切世希有 精進諸苦行

微妙莊嚴事 故現一切世

此法如是生 微妙事莊嚴

能除地獄等 所有生道苦

是時皆得滅 除彼塵垢穢

善勝微妙事 故現諸人中

是時皆平廣 大山及諸河

以瑠璃為地 清淨平如掌 諸寶雜色樹

精妙普樂見 刹中復有此 嚴淨焰光明

金色諸精妙 翳障於日月 多種雜寶座

有諸菩薩坐 威光如百日 衆相莊嚴身

無量諸池邊 周匝摩尼寶 八分功德水

清淨盈滿中 百千種蓮華 莊嚴彼池裏

廣大如車輪 展轉倍於前 復有堅牢座

一切寶所成 百千億千天 天衆悉端嚴

奏諸微妙音 讚歎及歌詠 如來神力故

出此衆妙聲

出如是等音樂歌詠事相偈法有過無量無邊阿僧祇法句爾時世尊集會之中所有諸天及以人等有大乘行者樂大乘者信廣大意者因此無邊光明力故見彼一切佛刹如是功德莊嚴清淨其中天人有行聲聞辟支佛行者不見不知佛刹功德莊嚴清淨其諸菩薩摩訶薩等在此刹中悉得無量無邊阿僧祇三昧陀羅尼神通法句復有諸大聲聞得入一切寂滅三昧爾時有師子座縱廣正等高百億由旬自然而現七寶所成天衣敷

上時有如來身大無邊現於座上跏趺而坐其身相好端嚴無譬顯現具足有大蓮華縱廣正等高八萬四千由旬七寶所作出現佛前有無量百千億那由他蓮華莊嚴圍繞開敷柔軟精妙端嚴復有過無量阿僧祇數幢幡懸蓋種種雜寶間錯而成於虛空中懸無量無邊真珠等貫及諸繒束復懸無量無邊寶鈴羅網有如是等功德莊嚴於此佛刹自然顯現如是不可說無量無邊阿僧祇未曾有事於此娑婆佛刹中現又不可說不可量

不可數大莊嚴神通之力昔所未見本未曾聞於此娑婆世界中現如是等最大最勝希有之法爾時彌勒菩薩摩訶薩即發此念何因何緣此佛剎中顯現希有不可思議大莊嚴事神通之力令衆踊躍我當問佛至真等正覺破此疑心某四爾時彌勒菩薩摩訶薩從座而起偏袒右肩以其右膝置蓮華上向佛合掌而白佛言世尊我今有疑欲問如來願開疑網佛告彌勒如來至真等正覺常開汝問若有疑惑當為解說爾時彌勒菩薩摩訶薩

蒙佛許已白佛言世尊是誰因緣有此事相於此娑婆佛剎顯現如是希有奇特踊躍之法所謂現神通力一切功德莊嚴佛剎勝淨嚴飾明徹無垢一切惡心悉已除滅乃至不可稱說無有窮盡未曾聞見世尊此菩薩衆見如是等神通為法世間顯現一切疑惑世尊欲為何事爾時彌勒菩薩摩訶薩說偈問佛

世間希有今是何 顯現如是大世尊  
驚怪未曾有斯法 今於此事生疑惑

震動大地并巨海 或有安住淨世界  
 開敷清淨金光網 除滅世間一切暗  
 蓮華百千無有邊 復有雜華妙寶樹  
 億數幢蓋及繒幡 并真珠貫鈴網等  
 無量種種福慧光明 滅除一切惡道苦

世尊何事現此相 妙淨娑婆佛刹中

說此語已佛告彌勒菩薩摩訶薩言汝可復  
 座吾當為汝分別解說何因何緣大希有法  
 世間現者彌勒東方過阿僧祇恒河沙等佛  
 刹彼有佛刹名清淨光輪功德莊嚴寶縷界

廁彼佛刹有佛名開敷精妙具莊嚴神通法  
 界輪一蓋吼聲毗盧遮那藏安自在王如來  
 至真等正覺現在遊行演說法要世界清淨  
 除滅慳貪瞋癡一切煩惱諸惡道等彼佛刹  
 中十住菩薩摩訶薩之所居住彼佛刹中有  
 菩薩摩訶薩名海妙深持自在智通得一切  
 菩薩禪定三昧神通陀羅尼是為第一持一  
 切寶莊嚴殿與過無邊數諸菩薩摩訶薩從  
 虛空中欲來至此娑婆佛刹是善丈夫威神  
 力故於此世界作大莊嚴神通自在先現是

事爾時世尊說此事已海妙深持自在智通菩薩摩訶薩及其徒衆即時現大威德光輪莊嚴之中有無量億光明羅網具足圍繞虛空中行作百千種音樂歌詠部別各各雨衆天華復放百千憶那由他光明來至於此娑婆佛刹即以寶莊嚴殿安置欲色二界空中既安置已與其徒衆從空中下至於佛所合掌向佛接足頂禮圍繞三匝爾時海妙深持自在智通菩薩摩訶薩與其徒衆合掌恭敬白佛言世尊唯願如來憐愍我等納受坐此

寶莊嚴殿世尊於此寶莊嚴殿爲大菩薩衆說無等等深妙之法爾時世尊告海妙深持自在智通菩薩摩訶薩言善哉善哉善丈夫汝今以此寶莊嚴殿奉施如來至真等正覺善丈夫汝於此賢劫中毗婆尸佛已來乃至賢劫千佛以此一切寶莊嚴殿過去亦施現在亦施未來亦施善哉丈夫乃能以此大寶莊嚴殿飾此中娑婆佛刹爾時海龍王白佛言世尊寶莊嚴殿今在何處復若大小爾時世尊告龍王言龍王彼寶莊嚴殿置在欲色

二界空中縱廣三千大千世界龍王彼寶莊嚴殿一切諸佛菩薩神通三昧力故出彼寶殿一切菩薩安樂之處堪以供養奉獻如來龍王復彼寶殿佛所居處又是如來福力故生能令菩薩心得清淨復能照明十方世界使諸衆生心意歡喜隱翳一切諸天宮殿不可說無邊莊嚴之事成就具足普告十方一切菩薩皆令覺知龍王彼寶莊嚴殿白瑠璃爲上閻浮檀金爲壁功德藏寶以爲女牆碼碯藏寶以爲却敵摩尼寶藏以爲欄楯淨光

明寶以爲欄柱普光明寶以爲其輦一切衆寶以爲其座一切雜寶如半月形光明無邊以覆殿上八萬四千億那由他柱雜色端嚴衆寶所成精妙具足最勝供養稱可如來龍王其彼寶殿懸諸雜寶無量無邊真珠繒綵金鈴羅網立正妙幢懸諸幡蓋牛頭栴檀以塗其地燒堅栴檀及以沉水最上妙香以之爲熏龍珠寶華間錯莊嚴以種種華徧散其地龍王彼寶莊嚴殿一切所有諸殿柱上無數千億諸天子坐作天五音最妙歌讚出聲

踊躍諸法明門從音樂出龍王彼寶莊嚴殿  
周帀輪迴大風所持有百千億七寶妙池金  
沙爲底八功德水清淨盈滿一一池中無數  
百千億那由他蓮華開敷七寶填飾妙色端  
正是諸蓮華大如車輪龍王彼寶莊嚴殿有  
寶樹園周帀圍繞有如意樹種種雜寶華果  
莊嚴懸諸鈴網及真珠貫繒綵細氎以爲莊  
飾出微妙香令心踊躍種種寶塔妙色端正  
以爲莊嚴龍王一樹下各有七寶師子之  
座天迦尸迦衣以爲敷具彼師子座高廣微

妙成就具足稱可一切諸佛菩薩龍王十方  
所有一切諸佛刹土所有瓔珞莊嚴及諸華  
雨一切現彼寶莊嚴殿龍王彼寶莊嚴殿如  
是等大及以安住爾時世尊告菩薩衆言諸  
善丈夫爲滿海妙深持自在智通菩薩摩訶薩  
願故汝等隨我向於寶莊嚴殿彼處俱坐爾  
時世尊從座而起與不可數諸菩薩摩訶薩  
前後圍繞時海妙深持自在智通菩薩在於  
右邊彌勒菩薩在於左邊於虛空中安詳而  
去向寶莊嚴殿至彼處已爾時世尊與菩薩

衆入彼寶莊嚴殿中東面有師子座高無  
數由旬縱廣正等是時世尊即坐其上世尊  
坐於師子座時彼寶莊嚴殿六種震動出百  
千億那由他無量種種大光明網所謂青黃  
赤白紅紫金色彼諸天子作天音樂及以歌  
讚某四雨大天華然諸天香恒不斷絕爾時世尊  
告菩薩衆言諸善丈夫汝等各各敷蓮華座  
而坐其上世尊勅已彼菩薩衆各就蓮華座  
上而坐佛及菩薩摩訶薩衆皆悉坐已時海  
妙深持自在智通菩薩摩訶薩作是思惟我

於今者供養如來至真等正覺兼復諮請問  
於佛地時海妙深持自在智通菩薩摩訶薩  
即從座起隨意所生種種無量無邊阿僧祇  
華香塗香末香華冠衣服幢幡寶蓋音樂歌  
歎供養世尊及菩薩衆恭敬尊重承事供養  
生希有心供養訖已又復出此勝供養具所  
謂寶真珠貫牛頭梅檀七寶為華以大寶珠  
名師子無礙寶藏清淨明徹以手執持供養  
世尊及菩薩衆為供養故散於如來徧覆其  
上散已禮世尊足繞百千帀向佛合掌以偈

讚曰

顯現無量妙相身	平正端嚴無闕少
螺髻孔雀烏蜂色	額平悅澤而廣開
毫相圓開如妙華	雙眉形似初生月
鼻高隆直妙無譬	眼如日照青蓮色
耳埵妙如芭蕉莖	齒齊如白拘勿頭
舌廣紅色得勝味	脣厚圓滿赤朱色
妙肩洪滿現無闕	垂臂如風吹娑羅
爪甲長妙赤銅色	手指縵網如鵝王
足下千輻妙輪相	皆由往昔大施生

菜四

九

功德勝形師子臆	體相莊嚴妙端正
腰如弓弣金剛杵	陰相不現如馬藏
脛脰圓滿如象鼻	脚踝端正而平滿
指掌輪相鵝王網	進止徐詳師子步
如來具此一切相	是故頂禮功德王

爾時海妙深持自在智通菩薩摩訶薩讚歎  
訖已復白佛言世尊我今有疑欲問如來至  
真等正覺若佛世尊開我疑問乃敢請說作  
是語已佛告海妙深持自在智通菩薩摩訶  
薩言善丈夫今若有疑恣汝樂問吾當為汝

分別解說令心歡喜爾時海妙深持自在智通菩薩摩訶薩白佛言世尊佛地有幾一切菩薩及聲聞辟支佛所不能行作是語已佛告海妙深持自在智通菩薩摩訶薩言善哉善哉善丈夫汝今欲令一切諸菩薩能作明了利益安樂顯現佛智乃能問於如來此事汝善丈夫諦聽諦受善思念之吾當爲汝分別解說善丈夫佛有十地一切菩薩及聲聞辟支佛等所不能行何者爲十一名甚深難知廣明智德地二名清淨身分威嚴不思議

明德地三名善明月幢寶相海藏地四名精妙金光功德神通智德地五名火輪威藏明德地六名虛空內清淨無垢焰光開相地七名廣勝法界藏明界地八名最淨普覺智藏能淨無垢徧無礙智通地九名無邊億莊嚴迴向能照明地十名毗盧遮那智海藏地善丈夫此是如來十地名號諸佛智慧不可具說善丈夫佛初地者一切微細習氣除故復一切法得自在故第二地者轉法輪故說深法故第三地者說諸聲聞戒故又復顯說三

第  
四

十

乘故第四地者說八萬四千法門故又復降  
伏四種魔故第五地者如法降伏諸外道故  
又復降伏傲慢及衆數故第六地者教示無  
量衆生六通中故又復顯現六種大神通故  
謂現無邊清淨佛刹功德莊嚴顯現無邊菩  
薩大衆圍繞顯現無邊廣大佛刹顯現無邊  
佛刹自體顯現無邊諸佛刹中從堯率天下  
託胎乃至法滅亦現無邊種種神通第七地  
者爲諸菩薩如實說七菩提分無所有故復  
無所著故第八地者授一切菩薩阿耨多羅

三藐三菩提四種記故第九地者爲諸菩薩  
現善方便故第十地者爲諸菩薩說一切諸  
法無所有故復告令知一切諸法本來寂滅  
大涅槃故世尊說此如來十地名已即時此  
娑婆佛刹乃至十方不可說諸佛刹等一切  
現大十八種相所謂地動中動大動小搖中  
搖及以大搖小震中震及以大震小聲中聲  
及以大聲小吼中吼及以大吼小涌中涌及  
以大涌是諸佛刹或東傾西起西傾東起或  
南傾北起北傾南起或中沒邊起邊沒中起

某四

十一

一切佛刹如是旋轉現十二相其中無一衆生有惱害者放大勝光照諸佛刹滅除一切世間諸暗普得光明所有一切諸佛刹土皆悉於此佛刹中現或佛刹中有佛無佛若成若壞亦皆於此佛刹中現彼諸佛刹雨天華徧滿十方不可說不可說諸佛刹中所謂曼陀羅華摩訶曼陀羅華曼殊沙華摩訶曼殊沙華盧遮華摩訶盧遮華月華大月華善月華等乃至一切刹中所有音樂不鼓自鳴大希有事皆悉出現諸佛刹中彼諸佛刹所

有侍者悉從座起各問如來諸希有事時彼諸如來爲其廣說解所疑問爾時此寶莊嚴殿中海妙深持自在智通菩薩摩訶薩及諸菩薩集坐衆等咸悉驚怪竒哉竒異何因何緣世尊說此佛深境界如來所行甚深難知微密難見一切菩薩非所行處況諸聲聞及辟支佛何以故我等未曾得聞如此如來十地不可思議諸佛境界我等爲此善事和合相隨請於如來至真等正覺廣說佛地諸菩薩摩訶薩各從座起合掌向佛說偈請言

最勝無上尊 此間無等說 一切佛諸地  
 向者已說名 我等今驚怪 未曾聞此法  
 聞諸地名已 心意俱踊躍 如饑思美食  
 渴者念甘泉 如是我欲聞 願佛說諸地  
 說此語已彼諸菩薩繞佛三匝禮世尊足各  
 各在於蓮華座坐爾時世尊如師子王安詳  
 顧視觀察十方觀十方已告海妙深持自在  
 智通菩薩摩訶薩言善丈夫如來諸地甚深  
 難知不可得底難可覺了出過一切文辭言  
 說何以故善丈夫聲聞辟支佛等諸地尚不

可說何況菩薩諸地一切如來佛地名也時  
 海妙深持菩薩白佛言世尊聲聞諸地為有  
 幾多佛言善丈夫聲聞之地凡有十種何等  
 為十一者受三歸地二者信地三者信法地  
 四者內凡夫地五者學信戒地六者八人地  
 七者須陀洹地八者斯陀舍地九者阿那舍  
 地十者阿羅漢地善丈夫是名十種聲聞之  
 地海妙深持菩薩復問佛言世尊辟支佛地  
 復有幾許佛言善丈夫辟支佛地有其十種  
 何等為十一者昔行具足地二者自覺甚深十

二因緣地三者覺了四聖諦地四者甚深利  
 智地五者八聖道地六者覺了法界虛空界  
 衆生界地七者證寂滅地八者六通地九者  
 徹祕密地十者習氣漸薄地善丈夫是名十  
 種辟支佛地海妙深持菩薩復問佛言世尊  
 諸菩薩地復有幾種佛言善丈夫菩薩諸地  
 有其十種何者為十一者歡喜地二者離垢  
 地三者發光地四者焰慧地五者難勝地六  
 者現前地七者遠行地八者不動地九者善  
 慧地十者法雲地善丈夫是名菩薩十種諸

地海妙深持菩薩復問佛言世尊一切自地  
 從何處生佛言善丈夫一切自地從佛地生  
 海妙深持菩薩復問佛言世尊解脫解脫彼  
 此何異佛言善丈夫河水海水彼此異不海  
 妙深持菩薩言世尊河水海水廣狹有異佛  
 言如是如是善丈夫聲聞辟支佛解脫如彼  
 河水如來解脫如大海水海妙深持菩薩復  
 問佛言世尊諸大小河流入海不佛言如是  
 如是善丈夫如汝所說何以故所有聲聞法  
 辟支佛法菩薩法諸佛法如是一切諸法皆

悉流入毗盧遮那智藏大海海妙深持菩薩  
復問言世尊唯願世尊現初佛地住彼初地  
顯現一切如來境界令諸聲聞辟支佛等歡  
喜踊躍爾時世尊現自佛刹名無邊阿僧祇  
功德諸寶具蓋不思議莊嚴佛刹土縱廣百  
千億那由他恒河沙數三千大千世界微塵  
等諸佛刹是時諸佛刹入無邊阿僧祇功德  
諸寶具蓋不思議莊嚴佛刹中皆同一名所  
有小須彌中須彌大須彌一切黑山及小河  
中河大河及諸大海諸山林谷磐石峯崖巖

穢沙鹵險惡之處悉皆除滅無有地獄畜生  
餓鬼等道及天龍夜叉乾闥婆阿脩羅迦樓  
羅緊那羅摩睺羅伽人非人等亦悉除滅無  
有舊佛刹土功德莊嚴諸瓔珞等此佛刹中  
所有地際皆瑠璃成平整如掌大因陀羅紺  
色金剛為佛刹中出最上微妙莊嚴寶華阿  
輸歌林名菩提樹王七寶所成有雜妙色此  
菩提樹王高無邊恒河沙佛刹微塵世界縱  
廣正等彼菩提樹王種種妙寶以為華葉果  
實枝柯師子無礙摩尼雜寶以為莊嚴毗瑠

蘇四

十四

璃赤真珠貫鈴網縵絲彼菩提樹出電光焰  
 不斷不絕或放金光或摩尼光或因陀羅紺  
 光或玻璃光或日寶光或月寶光彼菩提樹  
 王出最妙香所謂沉水香多伽羅香黑沉水  
 香多摩羅跋香黑梅檀香龍梅檀香牛頭梅  
 檀等香香氣出時徧徧佛刹其菩提樹王出  
 歌讚聲或雨寶雨徧諸世界彼菩提樹下於  
 其東面出生大池七寶所成清淨無濁名曰  
 摩訶菩提池王深無邊恒河沙等三千大千  
 微塵等世界縱廣正等以閻浮檀金沙布底

八功德水具足盈滿池四方面各四階道眾  
 寶所填種種雜寶欄楯具足彼池水中出大  
 蓮華名善開敷菩提蓮華相王七寶所成縱  
 廣無邊恒河沙等三千大千微塵等世界七  
 寶所作復有百千億那由他無量無邊諸寶  
 蓮華周而圍繞眾妙七寶莊嚴為葉柔軟妙  
 香令人愛樂其蓮華王臺上出菩提輦王名  
 無邊寶嚴飾七寶所成高阿僧祇恒河沙等  
 三千大千微塵數等世界縱廣正等彼寶嚴  
 飾菩提輦王所有服飾最勝最多上中之上

泉四

十五

彼寶莊嚴殿中所有服飾所有莊嚴及神通力百分千分百千億分不及其一譬如螢火在日光前其明隱翳如是如是寶莊嚴殿在無邊寶嚴飾菩提輦王前時全不復現如是種種無量無邊莊嚴瓔珞所有服飾神通莊嚴及以光明能令一切日月光明悉不能照無有精光一切帝釋光一切梵天光一切首陀會天光於彼無邊寶嚴飾菩提輦王前所有若明若光若精若照者無有此事於彼輦中出摩訶菩提師子座王名善照無礙師子

莊嚴七寶所成光色無等衆事具足迦尸迦天衣以覆其上高百億恒河沙等微塵等世界縱廣正等釋迦牟尼即便坐彼師子座上轉名無垢威功德師子月光毗盧遮那藏瑠璃幢圓通光明功德威聚日月智光王如來大身正等如百億恒河沙佛刹微塵數三千大千世界等一切身分皆悉具足滿三十二大人之相八十種好莊嚴其身項背輪光莊嚴其頭不可見頂其身清淨譬如日月照鏡中光彼如來身亦復如是無有肉血及以骨

髓非因父母歌羅邏時其身化生清淨如彼  
閻浮檀金及淨瑠璃因陀羅寶紺光等色彼  
如來身清淨如是無有一切微細習氣彼佛  
世尊衆相具足一切智師諸法自在度於彼  
岸無上等覺最勝大慈是最大人師子丈夫  
已得漏盡堅金剛身百福德聚具足十力及  
四無畏十八不共法正師子吼壽命無量清  
淨佛刹成道自在光明自然無量無邊菩薩  
之衆前後圍繞彼諸菩薩各各色身皆得具  
足在寶樹下於彼池中蓮華輦上坐師子座

卷四

十六

其身相稱菩薩各各而自莊嚴猶如如來莊  
嚴具足如是佛刹功德嚴淨身清淨衆清淨  
劫名無邊際莊嚴摩訶劫王其劫清淨若欲  
說此廣大佛刹及佛行者無有是處若如是  
覺名爲如來住佛初地爾時世尊告海妙深  
持自在智通菩薩摩訶薩言善丈夫汝見如  
來神通智不海妙深持自在智通菩薩答言  
見也世尊見也如來佛言善丈夫此是佛之  
初地名甚深難知廣明智德善丈夫汝今當  
知有正真願莊嚴功德相一蓋震聲主威王

如來寶德明徹藏功德身相淨如來不動離  
難光明如來有神通力蓮華生功德威相勝  
瓔珞摩尼王如來在喜樂刹中天人尊重復  
有阿彌陀如來蓮華開敷星王如來龍主王  
如來寶德如來有如是等生淨佛刹所得道  
者彼諸如來得初佛地如來在此地中作是  
神通如我今日神通無異海妙深持自在智  
通菩薩復問佛言世尊若有五濁刹中諸佛  
如來現得道者當成道者而彼世尊現得當  
得如來地不佛言善丈夫若諸佛菩薩能現

卷四

十七

善巧方便者得所以者何為諸衆生起大慈  
心見諸衆生閉在三有稠林之中是諸衆生  
無明暗中愛網所覆信其不淨顛倒邪見無  
量諸苦臨三惡岸輪迴六道煩惱展轉無有  
前際不知本際彼諸衆生不知諸佛及諸佛  
法諸菩薩法亦不如實知諸解脫善丈夫諸  
佛菩薩如是知彼一切衆生多受諸苦善丈  
夫爾時應佛出現五濁世界或堯率下入胎  
住胎初生及長宮中喜樂出家苦行向於道  
場降魔成佛轉大法輪與諸外道共論議時

依法降伏傲慢衆數乃至促壽現大涅槃入  
涅槃已三昧力故顯現自身分布舍利大如  
芥子天龍人非人等生其喜心爲供養故造  
作無量百千億那由他諸舍利藏或有於彼  
法中出家修持苦行或爲菩提而作種子度  
於煩惱有海彼岸善丈夫一切諸佛有如此  
法令無量無邊諸衆生等度於煩惱有海彼  
岸善丈夫汝今當知若五濁世中如來所現  
神通之力皆佛應化或諸菩薩神通力故善  
巧方便應化所出海妙深持自在智通菩薩

復問佛言世尊佛身幾種佛言善丈夫略說  
有三何等爲三一者報二者應三者真身海  
妙深持自在智通菩薩復問佛言世尊何者  
名爲如來報身佛言善丈夫若欲見彼佛報  
者汝今當知如汝今日見我現諸如來清淨  
佛刹現得道者慕四當得道者如是一切即是報  
身海妙深持自在智通菩薩復問佛言世尊  
何者名爲如來應身佛言善丈夫猶若今日  
踊步健如來魔恐怖如來大慈意如來有如  
是等一切彼如來穢濁世中現成佛者當成

佛者如來顯現從兜率下乃至住持一切正法一切像法一切滅法善丈夫汝今當知如是化事皆是應身海妙深持自在智通菩薩復問佛言世尊何者名爲如來法身佛言善丈夫如來真法身者無色無現無著不可見無言說無住處無相無執無生無滅無譬喻如是善丈夫如來不可說身法身智身無等身無等等身毗盧遮那身虛空身不斷身不壞身無邊身至真身非虛假身無譬喻身是名真身海妙深持自在智通菩薩復問佛言

世尊若諸佛真體無色無現乃至不可說不可說者豈非斷相也佛言善丈夫於汝意云何虛空界者可有斷絕及有相不海妙深持自在智通菩薩答言世尊虛空界者不可斷絕亦無有相世尊何以故若虛空界有斷絕者彼虛空界不名無礙世尊虛空界無有相處聚處邊處色處及以物處是故世尊彼虛空界不可斷絕非是有相世尊是虛空界徧一切處佛言善哉善哉善丈夫如是如是善丈夫如來真實身無有斷絕亦無有相何以

蘇四

十九

故善丈夫若如來真實身有斷絕者亦無佛  
出及現無邊神通之力若有相者即有聚處  
及以處所可執可捉一切凡夫悉皆一時即  
得成佛不應依時而有次第善丈夫是故如  
來真實之身非可斷絕亦非有相惟是普為  
一切衆生作其佛事海妙深持自在智通善  
薩復問佛言世尊供養如來真身報身及以  
應身所得福業何者最多佛言善丈夫若供  
養一如來身即是供養一切佛身何以故善  
丈夫一切光明能破諸暗普使得明而此光

明不共暗住如是如是善丈夫若有各各供  
養如來身者所造福業能破一切是無明暗  
開解脫明路亦復不共諸暗障住海妙深持  
自在智通菩薩復白佛言世尊唯願顯現第  
二佛地佛言善丈夫汝能見不海妙深持自  
在智通菩薩言世尊我於今者欲依相見爾  
時世尊一毛孔中即放光明名無相照乃至  
不可說不可說諸佛刹所有諸色一切除滅  
爾時世尊問彼一切菩薩衆言汝等今者有  
何所見諸菩薩言世尊都無所有唯見光明

佛言諸善丈夫汝等見此光明何似諸菩薩  
言世尊我唯徧見無量百千億那由他恒河  
沙微塵等諸佛刹一大光明爾時世尊還攝  
光明佛刹如舊如是安住是時世尊告一切  
諸菩薩衆言如來若說第二佛地汝等一切  
尚難知聞何況得見如來三地乃至十地善  
丈夫譬如日月光明與一切衆生作大利益  
彼日月力令衆生知有一日半日一月半月  
乃至一年及以時分衆生不能分別見彼日  
月色身汝等唯見光輪形相如是如是如來

至真等正覺一切衆生作大利益是如來力  
令彼衆生得知諸法若罪若福若世間若出  
世間若有漏若無漏知諸法已彼如實證得  
度一切諸有曠野彼諸衆生不能分別得見  
如來報身色相唯觀神通力用應化之形是  
故汝等應如是知如來諸地出過於一切音  
聲語言唯有名字而可說耳爾時海妙深持  
自在智通菩薩摩訶薩白佛言世尊誰是過  
度一切惡道佛言善丈夫若有於此一切佛  
智行入毗盧遮那藏甚深如來十地大乘同

性經典聞已生信信已受持讀誦書寫若教  
他書廣為人說乃至受持此經典名善丈夫  
所有應墮諸惡道者即皆得度菩薩復問佛  
言世尊誰是發菩提心者佛言善丈夫若能  
受持如此經典乃至受持名字者是菩薩復  
問佛言世尊誰是行菩薩行者佛言善丈夫  
若有受持此經者是菩薩復問佛言世尊誰  
是速滿具足六波羅蜜者佛言善丈夫若能  
受持此經典者是菩薩復問佛言世尊誰是  
當得值如來者佛言善丈夫若有能聽此經

典者是菩薩復問佛言世尊誰是值佛得受  
記者佛言善丈夫持此如來秘密者是菩薩  
復問佛言世尊誰是為諸衆生作大商主佛  
言善丈夫若有持此如來與藏者是菩薩復  
問佛言世尊誰是佛子佛言善丈夫有能信  
此經典者是菩薩復問佛言世尊誰是當得  
一切菩薩地佛言善丈夫有能聽此經典者  
是菩薩復問佛言世尊誰是得一切諸佛法  
者佛言善丈夫有能供養此妙法明者是菩  
薩復問佛言世尊誰是知聲聞辟支佛法而

不取彼涅槃佛言善丈夫有能受此妙法藏  
者是菩薩復問佛言世尊云何名此經我等  
云何奉持佛言善丈夫此經名為大乘同性  
亦名說一切佛智行入毗盧遮那藏如是受  
持爾時世尊而說偈言

欲覺佛菩提 無上勝精進 欲轉聖無漏  
難思智法輪 若欲建法幢 欲打於法鼓  
欲得然法燈 欲得吹法螺 欲得智明照  
欲滅愚癡暗 欲奪諸眾生 安立菩提智  
欲降伏魔軍 供養一切佛 欲照諸世間

尊勝妙清淨 不染世諸法 欲得無漏智  
行行利眾生 欲生清淨刹 教寫聽受持  
如是妙經寶 為令通佛地 讀誦及宣揚  
爾時世尊說此經已海妙深持自在智通菩  
薩摩訶薩并及一切諸菩薩眾聞佛所說歡  
喜奉行

集四

廿二

佛說大乘同性經卷下

音釋

切	外	日	諸	也	也	耗
輦	踝	內	疋	縷	也	仁
切	傲	切	切	綫	羽	志
展	慢	博	博	也	為	飾
	傲	駕	切	切	也	以
	慢	脛	脛	攔	毛	環
	莫	傍	傍	楯	環	釧
	晏	禮	禮	楯	釧	環
	切	切	切	食	尺	戶
	情	倨	胡	也	切	關
	也	也	定	切	切	切
	紺	也	也	螺	璫	都
	深	古	切	髻	充	郎
	青	暗	腿	切	耳	郎
	也	切	胡	髻	珠	切
	填	兩	瓦	古		
	年	旁	切			